

摘藻堂四庫全書薈要

集部

欽定四庫全書薈要卷二萬二百八十五

集部

宋詩鈔卷三十二

內閣中書舍人吳之振編

晁冲之具茨集鈔

冲之字叔用初字用道舉進士與陵陽喻汝礪為同
門生少年豪華自放挾輕肥游帝京狎官妓李師師
纏頭以千萬酒船歌板宿從雜遝聲艷一時紹聖初
黨禍起羣從多在黨中被謫遂遂飄然棲遁于具茨

之下號具茨先生十餘年後重過京師憶舊游作無
題詩二首為時所傳時諸公謀欲用之高揖不顧至
疾革取平生所著曰是不足以成吾名悉焚之故其
詩不多呂紫微位之江西派中云衆人學山谷叔用
獨專學杜詩衆求生西方時秀實獨求生兜率然又
云叔用嘗戲謂我詩非不如子只子差熟耳答云熟
便是精妙處叔用大笑此亦紫微多上人語耳若其
淵渟雅亮筆有餘閒未宜退下一格也劉後村稱其

意度容濶氣力寬餘一洗詩人窮餓酸辛之態南渡
後惟放翁可以繼之其見許如此足為雅鑒

古樂府

大星何歷歷小星爛如石掖垣崔嵬橫紫微十二羽林
森北極今夕何夕月欲沒虎抱空闕龍厭直崢嶸北斗
著地垂手去瓠瓜不盈尺嚴陵醉卧光武傍浮楂正值
天孫織王良挾策飛上天傳說空騎箕尾立君不見茂
陵棄子欲登仙自將壯士終南邊忽然遭窘出璽綬歸

來下詔除民田阿瞞急示乘輿物鮮卑仍棄珊瑚鞭又
不見古來垂堂戒華屋敵國挾輶戎接轂白龍魚服誤
網羅孔雀金花被牛觸

夷門行贈秦夷仲

君不見夷門客有侯嬴風殺人白晝紅塵中京兆知名
不敢捕倚天長劍著崆峒同時結交三數公聯翩走馬
幾馬驄仰天一笑萬事空入門賓客不復通起家簪笏

一作筆

明光宮嗚呼男兒名重太山身如葉手犯龍鱗心

莫懾一生好色馬相如慷慨直辭猶諫獵

陸元鈞宰寄日注茶

我昔不知風雅頌草木獨遺茶比諷陋哉徐鉉說茶苦
欲與淇園竹同種又疑禹漏稅九州橘柚當年錯包貢
腐儒妄測聖人意遠物勞民亦安用含桃熟薦當在盤
荔子生來枉飛鞚羊薤異好亦何有蚶菜殊珍要非奉
君家季疵真禍首毀論徒勞世仍重爭新鬪試誇擊拂
風俗移人可深痛老夫病渴手自煎嗜好悠悠亦從衆

更煩小陸分日注密封細字蠻奴送槍旗却憶採擷初
雪花似是雲溪動更期遣我但敲門玉川無復周公夢
贈僧法一墨

黃山之巔百尺松虬枝偃蓋連羣峰山神守護魑魅避
道人剪伐天為容捫崖跼蹐篝火遠絕壁晦靄凝煙濃
玄霜霏霏玉杵下捕麋煮角當嚴冬陰房風日不可到
律琯吹盡灰無蹤小書細字著名姓黃金照耀圖雙龍
守臣再拜選進日九闕有詔開重重老儒偶得實天幸

千金更買無由逢上人澹泊何所好工書草隸如飛蓬
苦來求我惜不得一酬十載相過從君不見玉堂詞人
紫垣客拜賜舞蹈黃羅封長安紙價猶未貴江南江北
山皆童

法一以余所贈墨為不佳

上人好事世莫當羅列四寶如文房廣交往往得奇物
有墨尺度如圭長秋麋折角膠與力春麝入臍煤生香
已將雪覆輕羅帕更令花映紅紗囊草堂老人不自料

亦藏一餅誇精妙自言和壁持贈君反為燕石遭譏誚
嗚呼萬事孰不然古今工拙那同調君不見當年諸李
數不到廷寬只今賜墨無老潘

復以承晏墨贈之

我聞江南墨官有諸奚老超尚不如廷珪後來承晏復
秀出喧然父子名相齊百年相傳文斷碎彷彿尚見蛟
龍背電光屬天星斗昏雨痕倒海風雲晦却憶當年清
暑殿黃門侍立才人見銀鈎洒落桃花牋牙床磨試紅

絲研同時書畫三萬軸大徐小篆徐熙竹御題四絕海
內傳秘府毫芒惜如玉君不見建隆天子開國初曹公
受詔行掃除王侯舊物人今得更寫西天貝葉書

東陽山人僻居

我家京洛間桂玉資薄產平生丘壑心水竹不滿眼清
晨有客吳中來山川指授收奇才笑談長揖波浪下懷
抱遠承一作宛陳嵒穴開東陽山人高華隱豪俠持身復修

謹旁山多闢黍稷田碧溪東流汲春醞溪南一畝當翠

微秋風萼熟菰葉肥龜魚上帶藻荇動鷗鷺下拂芙蓉
飛亭陰野塘亦新築溪山共作窓中綠諸郎年少皆知
書子夜哦詩動修竹歲時冠蓋如浮雲擊鐘鼎食江淮
聞愛山自比謝康樂好士不減春申君我欲沿溪揚小
楫亭邊共醉藤蘿月叩門夜訪君家時扁舟重載山陰
雪

同魯山韓丞觀女靈廟前險石

君不見魯陽之西兩山麓十里連岡寫平陸青林白晝

暗古祠崔嵬虛簷蛛網屋屋邊怪石何瑰竒鳳筋虎骨
連肌肉巉巖欲下落澗渚瀕洞千鈞一毫屬天匠惟知
刻畫功鬼力深憂護持哭前峰高蹇下如揖餘峰危慄
皆俯伏披尋宿莽得佳趣窪為溪壑呀為谷香爐佛迹
不在外仙掌蛾眉此其足秀潤潛涵夏木清空濛映帶
春江綠我知此必蘊靈異何止懷藏易城玉閭寂嗟來
麋鹿游孤峻幸免牛羊觸自經千載禹刊鑿不逢萬里
秦驅逐踟躕三遶回高岡却立下視雲蒼蒼古今誰為

好事者後有韓子前奇章君不見玉川先生洛陽宅脩
竹蕭蕭獨為客它年如與鶴乘軒可來相見銅駝陌

題魯山溫泉

平生耳熟驪山夢寐不到臨潼關當年太液金井碧
溫泉宛在關山間憶昔君來必十月騎玉花驄帶風雪
太真獨侍沐浴邊鯨甲龍鱗影清絕五十年昇平一迷
却驅萬騎出關西自為前朝同禍水翻令後代異廉溪
君不見汝海之南魯山左亦有此泉名不播征夫問路

說湯頭可憐是亦陳驚坐

香山示孔處厚

我來南經幾山過馬行似衝山色破風煙席卷崑穴開
澗花縈迴水流左懸崖彷彿聞松聲下瞰幽深鳥飛墮
老夫它年有所歸定結白茅依紫邏日高下馬古寺門
魚鼓欣聞脫清餓道人碧眼照川谷雲起盤陀藉高坐
殷勤勸我更莫歸唳鶴啼猿亦相和窓前笑喚初孔賓
世間安用招魂些

簡江子之求茶

政和密雲不作團小夸寸許蒼龍蟠金花絳囊如截玉
綠面彷彿松溪寒人間此品那可得三年間有終未識
老夫於此百不忙飽食但苦夏日長北窓無風睡不解
齒頰苦澁思清涼故人新除協律郎交游多在白玉堂
揀牙鬪夸皆飫嘗幸為傳聲李太府煩渠折簡買頭綱

田中行

落葉如流人遷徙不可收嚴霜枯百草清此山下溝我

行將涉之脫屣笑復休
憮然顧籃輿崎嶇反經丘
天風吹我裳彼亦難久留
晚過柳下門鳥聲上嘲啾
父老四五輩向我如有求
邀我酌白酒酒酣語和柔
指云此屋南頗有良田疇
勸我耕其中庶結同社游
吾母性慈儉此事誠易謀
伯也久吏隱可以吾無憂
請歸召家室賣衣買肥牛
所望上帝喜祈穀常有秋

送王敦素

樸

先君有六女所託皆高門
季也久擇壻晚得與子婚
子

家望海內實惟謫仙孫筆力有家法勢作風雷轟結交
多英豪坐致名譽喧憶昔識子初河流出崑崙中間一
再見騏驎始伏轅去年接同居底裏見所存磊落忠義
人愛國憂黎元使當元祐時密勿與討論上可參廊廟
下可裨諫垣惜哉不過知白髮早已繁卑官不可說感
激猶主恩爛熳有歸期繫舟古槐根祖餞無酒食贈遺
請以言子家鐘山下隨事有田園竹徑背古寺草堂面
江村高軒納翠微修筒引潺湲林影散書帙山色搖酒

樽日飲建康水時登謝公墩沈酣左氏學浩蕩極辭源
客至勿多語欲吐且復吞書來無怱怱慰我別後魂

紀愁

北風吹我裳夏潦漂我屋牛羊踐我稼雀鼠耗我穀雪
寒墮我指雨淫疾我腹朝行桑榆間秋序傷遠目莫涉
水之涯含沙中兩足攬轡馬病黃伏軾輿脫輶陟山既
見虎還舍乃對鵬一沐三握髮十飯九不肉先生昔離
垢居士今耐辱飽聞戒畏塗那知有沈陸

和四兄雪夜韻

夏蟲不知冰越犬不識雪我獨冰雪間肘見冠纓絕青
燈挂長檠文字夜涉獵問米米已無問酒酒已竭當時
陶淵明同日無此闕置書忽不樂面壁卧嘔噎蟲犬兩
不如悲歌聊一發

和十二兄五首

淵明詩百篇無一不說酒四顧宇宙間獨與此物厚子
雲苦家貧日給或亡有艱難識奇字草玄至白首時時

載酒來尚乃好事友吾兄斯人徒性亦嗜醇酎寧知俗
士嫌益覺兒女醜孰云醉無度婉婉一作婉婉春月柳區區
布肉論遲速同一朽但看古聖賢得如飲者不

伯也今代豪嗜詩如嗜酒賦多轉道勁語老愈深厚塵
言刪不存妙句元自有白華忽補亡關雎不為首墳簞
起兄弟珠玉到朋友吟詠九日菊沉酣八月酎搜剔發
清新聯翩雜奇醜詳味吁謨章用意過楊柳但使身愈
窮未信名可朽不知造物意令作清廟不

崎嶇謫仙人豪放一寓酒平生韓荊州未識意已厚
幙府強辟召此例未見有書幣入吾廬鞍馬望隴首出處
計已熟不復訊交友南山別何時氣尚若酣酣籌策屈
大才談笑誅小醜戎角斷落梅羌笛起折柳將軍意未
快戰士骨已朽請公入叅謀可用和我不

先生翰墨英揮灑每被酒氣凌蒼柱穹勢壓坤軸厚俊
拔今固無妙絕古未有驚鸞忽矯翼犇馬時驤首高步
褚薛流下視鍾王友好事隨取之所至具名耐簡疎秦

隸竒譎怪夏篆醜么麼張芝草嫵媚元和柳載觀碑籍
存尚恐金石朽未知太極成有請於公不

我家溱洧間春水色如酒嵩少在吾旁日夕意亦厚田
園雖不廣幽興隨事有藥畦灌陳根芋區採駢首春郊
餉耕徒秋社接酒友飽誦傳家書促釀供客酌益知簡
易真未媿踈拙醜邇來居東都物色不見柳造次遇摧
折荏苒及衰朽欲歸便可爾未知公果不

次韻集津兄會羣從王敦素宿王立之園明日西

征馬上寄示諸人

以道嘗監陝府集津倉

秋高訪幽居風急桑未落天寒鷄犬靜地僻門巷濶主人避世賢自說久棲泊呼兒出罇罍梨栗亦不惡賓客四五人談笑動林薄夜闌慘無懽離憂倏中作伯也天下士千金輕一諾揮斥揚墨徒正是鄒魯學如何但銀魚生事了無託惜哉桃李姿見笑葵與藿鷄鳴驅車行令人意參錯

復至新鄉解寄張穉

驅車出吾廬落月猶在樹我行欲何之泝以河源去去
去益以遠炯炯不可論羣語車鐸間尚想兒女喧稍涉
原上路漸見柳下村霧草結宿露風林散朝暾悠悠望
蘧廬我僕欣載犇昔出日在畢今出畢中昏昔如水上
鷗今如檻中猿所憂負平生豈但感寒暄明濟十里黃
漪漪見淇園晚投伯氏廨拓落復何言周覽故時居恟
見松菊存故侶未易招且自置肴尊

書懷寄李相如

秋風吹畦蔬農事亦已闌黃黃杞下菊佳色尸家間我
生復何如憔悴嘗照顏清晨戴星出薄暮及日還骭髀
二十載老髮羞儒冠天未有佳人秀擢如芝蘭撫然念
夙昔風流得餘懽緬想蒲柳姿與君同歲寒一別事瓦
裂令人氣如山

戲李相如攜婦還金鄉

舍人固多奇奉壁登章臺君王擊缶罷將軍負荆來長
卿束髮時亦復悅名字一從臨邛游心迹了不似茂陵

未得仕要是才足依高堂援哀琴月出載婦歸文君入
成都乃復愧四壁晚見負弩來良悔抱頸泣

效古別昭德羣從

十載一相逢相見無浹旬一生能幾別且復無此身昔
別尚可惜此別重惜之兩髀跨鞍馬非復少壯時它人
怪康強自覺筋力衰所苦氣如縷所憂命如絲死生亦
大矣而乃常別離人生一月間得笑無六七朝為衆狙
喜莫作枯魚泣已矣泉下人優哉冢中骨

雪效柳子厚

一作贈一
兄上人

月落鷄聲寒曉色靜茅屋開門驚不知夜雪壓修竹
槎牙生新冰鱗甲刻溪谷晶晶洲渚明冽冽川原肅
孤蹲雀不動沉酣客猶宿呼童晨汲歸獨漱寒泉玉

擬一上人懷山之什

中夜雪打窓燈暗火照屋袖手地爐火餅聲起絲竹憶
我故山房松風韻崖谷山空牛斗寒寺靜魚鼓肅西寨
鹿不歸東嶺鶴獨宿更想醉翁亭兩峯高並玉

傷心

時籍路
公宅

沙路朱轡想馭軒傷心歲月似星奔平泉有墅空流水
綠野無人但繞垣九老畫圖傳盛事四朝書史載殊恩
如何巧者持塲過已向比隣問子孫

送惠純上人游閩

蚤聽閩人說土風此身嘗欲到閩中春溝

一作春陂

水動茶

花白夏谷雲生荔子紅襟帶九江

一作樹
接楚天

山不斷梯航

百粵

一作波
連越嶺

海相通北窓夜展圖經看手自題書寄

一作

索筆題
詩送 遠公

次四兄以道韻效李義山雪

莫冬一丈長安雪壯士臨風獨慨慷
門巷豈無騎馬客江湖猶有捕魚郎
夜平蔡賊兵輕敵曉入梁園賦擅場
載酒欲尋誰與飲江梅頭白自悲傷

次二十一兄季此韻

憶在長安最少年酒酣到處一欣然
獵回漢苑秋高夜飲罷秦臺雪作天
不擬伊優陪殿下相隨于蒨過樓前

如今白髮山城裏宴坐觀空習斷緣

和江子我竹夫人

黃藤白簟倦呼盧高卧南窓示楷模郭芍藥情元最密
鄭櫻桃迹近相疎下帷度日甘同夢隱几終年得異書
晚向禪房陪杖屨清秋霜霰意何如

答韓君表

百年鄠杜家相近人物凋零我獨驚但見少陵能繼祖
不聞小陸可優兄終朝詩賦適仍鬱老去文章健更成

敢擬濟河輕一戰，隱然望已。一作望怯長城。

和葉甥少蘊內翰重開西湖見寄二首

使君重鑿西湖罷，也復封詩寄我來。
洲上新題花鳥處，苑中舊體栢梁臺。
風煙直覺鍾山近，魚鳥渾疑澗水開。
揮翰玉堂還有日，行春停騎且留杯。

一麾偃蹇江湖去，五馬侵尋觀闕來。
就日金波通漢苑，望雲玉澗斷蘇臺。
自迎檝立看時渡，近聞買妾手種花行到。

處開笑語風流韓別駕，莫令鸚鵡訴餘杯。

和寄葉甥少蘊內翰見招

翰林赫奕今如此莫道人惟舊雨來
龐老終身遠州府
劉郎何面向春臺
八兄常言少蘊亦欲見招
園宜杏子非時結
溪澗梅花過日開
兩地聲聞無百里相望一覆手中杯

次韻再答少蘊知府甥和四兄以道長句并見寄
錦袍昔是詩成得別墅今非棋賭來
山蔚藍光交抱舍
水桃花色合圍臺
通人竹塢深深入謝客松扉遠遠開
定與西湖爭勝負只應惟欠使君杯

塵埃自與青雲斷歲月誰令白髮來數口無歸關外客
一春多病望中臺常閒水上鷗從遠只老籠中鶴任開
日日避愁無處脫直須到手不停杯

復和少蘊內翰甥兼謝伯蘊通判兄再贈

西湖波浪還佳色風物悲人老可驚游接竹林公對叔
夢迷春色我思兄酒沾鸚鵡杯行盡

前與伯蘊兄詩常有鸚鵡杯之戲

詩傍蟾蜍研立成壯思不逢韓吏部高名誰伴謝宣城

復用韻

史奏德星今復聚鄉評月旦昔何驚
潁川人望須公守
荀氏家聲付此兄
湖影龜魚同聚散
棠陰燕雀半生成
若為修襖無絲竹
古調新詩唱渭城

少蘊新作木
蘭花詩奇絕

次韻集津兄懷嵩少示王立之

早聞三十六峰前
願寄茅茨一澗邊
谷轉馬蹄山繚繞
嵩開虎口樹嬋娟
陽坡日煖宜瓜地
陰嶺天寒熟芋田
便好與公相隱去
不宜相對尚茫然

睡起

素屏紋簟徹輕紗睡起冰盤自削瓜
風筍微微開綠籜雨槐細細落黃花
經營薄產初無意補葺疎籬漸有涯
待得高秋尋靖老臨流坐石問丹砂

贈山人沈廣漢

禪房白几靜無塵野服黃冠意甚真
避世全生深得策閉門謝客亦高人
忍情斷酒非關病隨意收書不計貧
近約嵩陽陳叔易趁移丹竈過殘春

都下追感往昔因成二首

少年使酒走京華縱步曾遊小小家看舞霓裳羽衣曲
聽歌玉樹後庭花門侵楊柳垂珠箔窓對櫻桃卷碧紗
坐客半驚隨逝水主人星散落天涯

春風踏月過章華青鳥雙邀阿母家繫馬柳低當戶葉
迎人桃出隔牆花鬢深釵暖雲侵臉臂薄衫寒玉映紗
莫作一生惆悵事鄰州不在海西涯

送僧歸建州

清秋潁汝歸時晚不及羣公送惠休曲几數行題字別

扁舟幾日為詩留
東吳楊柳雲中渚
南越梅花雪外洲
萬里故鄉聊一到
江山風物往來游

送王敦素

樸

龍蟠山色引衡廬
霜落清江影碧虛
鼓枻厭騎沙苑馬
行厨欲食武昌魚
緩歌玉樹翻新曲
趣入金鑾續舊書
宦達故人稀會面
君來相見官如初

再至徐州示諸弟

去年客徐得范子
今年客徐不得人
斷無草木與同味

宛有魚鳥來相親南尋白門傍山麓西望黃樓行水濱
還家作詩示羣從早晚一遊攜二陳

留別江子之

盡室飄零去上都試於溱洧卜幽居不從刺史求彭澤
敢向君王乞鏡湖平日甚豪今潦倒少年最樂晚崎嶇
故人鼎貴甘相絕別後君須寄一書

別昭德弟愴然傷懷

吾廬去汝到何期四十年間此別離合抱樹元從舊種

幾叢菊始自新移老無兄弟飄零日遠有公卿曠絕時
努力不思勤負米欲求三徑可從誰

客有駕馬不肖借作詩誚之

男兒少欲立奇功貴買西宛玉面驄金蹀躞微鳴躡影
錦連乾不動追風庭槐洗立清陰下沙路調行返照中
出郭借人乘豈宜自誇騎入大明宮

別飾道二十弟

飄零南北一衰門知是澶淵五世孫嗟我獨無兄弟在

憐君尚有典刑存老身素苦貧常瘦病目仍緣哭轉昏
它日汝歸馳駟馬訪吾官過浣花村

自然詩

并序

七里先生江子我築土三尺名曰自然亭余謂先生
不獨有亭亦有自然箕斗自然絲菱凡亭之內服食
器用無不自然者先生可謂自足者也雖然無乃多
虛少實乎子我掀髯大笑余欣然賦之

先生手不廢經營白屋憑虛結此亭燕坐兔絲侵密坐

南箕北斗挂疎櫺
青松夾日交傾蓋
翠栢分風倚列屏
莫道君家無長物
案頭燈火有流螢

敦素有以書局處之者作詩迎之

君王側席訪詞臣
萬里江湖賀子真
翰苑向來非此老
道山何處得斯人
朝回金馬門前曉
宴罷銅駝陌上春
底事年年最如意
春風還試綵衣新

寄王立之

臘雨城南宅
衝寒憶屢陪
拊憐庭下石
問訊竹間梅
諸

子應門立羣公跋馬回不知多病後誰與倒樽罍

避暑普淨院

夭矯栢如龍清陰閤一宮庭無御史雨門有大王風今
日名天下羣公坐此中阿戎相就語歷歷見元豐

僧舍小山

此老絕蕭洒久參曹洞禪胃中有丘壑左手取山川樹
小風聲細巖深日影圓江湖不歸客相對一茫然

愛此聚沙戲知自法王孫一運郢斤手都無禹鑿痕藤

梢未挂壁荷葉欲生盆笑問山陰道潛通何處村
爛石有佳色禪房疊更幽九疑峰不斷十字水長流枕
簟日逃暑軒窓時卧遊吾衰更何往只此對湯休

寄江子之

平生江季子疎嬾近忘吾不啻三年別如何一字無燒
丹勾漏令釀酒步兵厨二者將安擇功名莫浪圖

初來東里

乘流從此去河漢失清都送騎沙邊散征帆雨外孤挾

雌棲隴雉生子哺巢烏宇宙將焉往飄飄盡畏途

至東里次前韻

茂陵家四壁不必在成都老矣招魂苦傷哉問影孤市中寧有虎屋上豈無烏四海皆行路吾何必此途

和四兄以道閒居感歎有作

掩卷忽不樂捫心空浩歎家聲畏淪墜世態屬艱難月倒迎門屣風彈挂壁冠蕭然對孤竹一笑共衰殘

復次韻

出門吾所嬾無客亦何歎舉世遽如許孤風良獨荒
蕪蔣詡徑破敝晏嬰冠興發看山去書籤記讀殘

再至都城

崢嶸花萼西清曉望猶迷御路紅塵合宮槐碧瓦齊夾
城知輦過複道覺香低中使傳宣入千門避馬蹄

送僧

無端伏枕日不見放舟時晚得平安報初成送別詩山
深歸履急江濶度杯遲定許同香火終叅惠遠師

秋雨感事

苦雨荒秋宅寒生木葉悲半垂藤護壁中缺蔓穿離書
校時開帙壺提日繫絲儒冠吾已悞何責五男兒

問訊次九日韻

問訊西南戍提封莫遠開休傳通蜀道端可棄輪臺擬
上平戎策慙無屬國才何須千里馬遠自渥洼來

夏室

夏室不禦暑竹陰新未交幽花時結子晚燕續開巢午

夢還高枕晨吹出近庖此身吾自了客至莫相嘲

次韻江子我見寄

敢恨新居僻深懷故國尊耕耘得遺物版築尚頽溪
隔城南寺崖通市北門它時如訪我但認語音存

過陳無已墓

以我懷公意知公待我情五年三過客九歲一門生
近訪遺文錄重經故里行寄書無鄭尹誰為葬彭城

行武涉田中

慣習兒童喜從容父老懼枯槁看俯仰稼穡愧艱難荷
葉生池岸蒲萄落井幹求田如得此當為駐征鞍

重過鴻儀寺

秋色遽如許寒花奈若何客行傷老大野次記經過廢
圃猶殘菊枯池但折荷吾生與物態天意豈蹉跎

別飾道二十弟

賁之

少傅三朝老文章壯九州賦詩資政殿賜字太清樓跋
燭辭軒陞簪花近冕旒慶門吾老矣華國汝能不

別息道二十二弟

兄之

中令有清德風流二百年舉家惟食粥絕口不言錢里
閑容吾老庭闈賴汝賢陶丘過范蠡莫泛五湖船

和虞道二十三弟

豫之

向別已復久此懷誰與明書來慰吾意詩重識君情放
鶴惜未到飛鴻今尚橫何由一隨汝端為薄浮名

決道念八弟得小金印以詩贈之

大之

季也獲金印籀文秦不如情知非鬼篆恨不識天書池

靜龜游罷庭間鵲鬪餘春風還舊物疎俊獨憐渠

贈江子我子之

江郎淮海秀經術古同師溫潤無前輩清新有近詩一
丘須早計五斗莫堅辭獻賦修竿牘知君定不為

謝富察見過

飯蔬君莫厭瓜果我時須自可隨豐儉誰能問有無墮
蜂衝博局驚燕避投壺不憚過從遠頻來訪老夫

戲留次哀三十三弟頌之

白下春泥尚未乾
汴流更待小潺湲
不知汝定成行不
寒食今無數日間

春日

男兒更老氣如虹
短鬢何嫌似斷蓬
欲問桃花借顏色
未甘着笑向春風

陰陰溪曲綠交加
小雨翻萍上淺沙
鵝鴨不知春去盡

爭隨流水趁桃花

一本作春色不堪流水
送雙浮鴨鴨趁桃花

以少炭寄江子之

金籍曾通玉虛殿仙曹擬拜翠微郎莫嫌薄上溫磨火
猶得濃薰鴛褥香

溫磨火事見
李義山詩

戲成

長夏軒窓倚碧岑人間塵土莫相侵榴花不得春風力
顏色何如桃杏溪

和二十二弟

靜處偷看肘後書幽棲古有此人無綠蓑青箬非吾事
白浪狂風滿太湖

襟抱恢疎老更寬
笑談終夕盡君歡
主人更有桃花面
病眼其如隔霧看

秋夜情

獨眠百感秋夜情
孤城急雨中聞更
明朝覽鏡視鬢髮
不知白從何處生

題超化寺壁

曲池風定碧瀾平
小白魚如鏡裏行
水竹再來應識我
壁間不用更題名

送人遊江南

湧金門外斷紅塵
衣錦城邊著白蘋
不到西湖看山色
定應未可作詩人

過王立之故居

酴醾架倒花仍發

一作花
無主

薜荔牆摧石亦移

一作客
有誰

此

地與君凡幾
醉年年同賦臘梅詩

夜行

老去功名意轉疎
獨騎瘦馬取長途
孤村到曉猶燈火

知有人家夜讀書

春晚圃田道中

度柳穿橋聽午雞一溝春水國門西
行人不用傷新別
看取塵間萬馬蹄

酒酣馳馬笑彎弓便擬長驅向敵中
但恐老儒無骨相
不堪劒履畫南宮

君王重老降褒書特賜宣陽宅一區
聞說會稽人不識
鑑湖還宥借臣無

和王立之臘梅

茅簷竹塢兩幽奇
岸幘尋花醉亦知
崖蜜已成蜂去盡
夜寒惟有露房垂

老去攀翻興益奇
招攜風月作新知
但令春釀常如此
百罰深盃亦倒垂

贈江端本子我

禪免鷄豚今日債
斷除妻子宿生緣
豐登便是人天供
努力東臯自種田

過陳無已墓

鎖門脫落封將盡
題壁污漫字不分
我亦嘗參諸弟子
往來徒步拜公墳

立春

巧勝金花真樂事
堆盤細菜亦宜人
自慚白髮嘲吾老
不上譙門看打春

與秦少章題漢江遠帆

楚山全控蜀漢水
半吞吳老眼知佳處
曾看八境圖


江山起暮色草木斂餘昏誰感離騷賦丹青弔屈原
雲埋鳳林寺浪打鹿門山今日江風惡郎船勸不還
江濶雁不到山深猿自迷傳聞杜陵老只在溪東西
石似浣沙石江如濯錦江征帆向何處雲霧晦蓬窓

龍興道中

澗道垂黃花山城擁紅葉人爭小舟渡馬就平沙涉
謝任伯久無書常子然寄茶謝之因簡任伯

諫議茶猶送郎官迹已疎斜封三道印不奉一行書

宋詩鈔卷三十二



總校官庶吉士臣張能照

校對官庶吉士臣陳墉

謄錄貢生臣張健

欽定四庫全書薈要

集部

宋詩鈔卷三十三



詳校官候選知縣臣吳興華

欽定四庫全書舊要卷二萬二百八十六集部

宋詩鈔卷三十三

內閣中書舍人吳之振編

韓駒陵陽集鈔

駒字子蒼蜀仙井監人嘗在許下從蘇轍學稱其詩

似儲光羲遂名於時政和以獻頌補假將仕郎召試
賜進士除秘書正字尋坐蘇氏黨謫知分寧召為著
作郎奏舊祠祭樂章辭多抵牾因更撰定五十餘章

遷中書舍人兼修國史權直學士院復坐鄉黨曲學
提舉江州太平觀卒於撫州詩有磨淬剪裁之功不
吝改竄有寄人數年復追取更定一二字者故其集
不多而密栗以幽意味老淡直欲別作一家紫微引
之入江西派駒不樂也

利濟橋亭詩

朝奉郎張公得其先父遺碑以附家集從諸公索詩
予為作此

大夫官業世所驚老覺軒冕非真榮斯文自屬吾黨事
正恐無路逃虛名生猶不見皇甫謐死豈肯投劉禹錫
茂陵一幅入漢宮世間共怪無遺帙哀哉若人用意深
自言身作鶴鳴陰著書遺子三萬軸人初笑我羸無金
萬仞磨崖利好語那知百年蒼蘚汙爾來夜夜虹貫天
山下居民未知處周詩不列石鼓歌後世恐嘆遺義娥
于今購市完家集野老何知亦摩挲川流可平石可腐
只此殺青垂萬古五百驪珠固已竒挿架不知猶幾許

公今未暇歸田廬且當驅童曬蠹魚不辭借取車連軫
要讀人間未見書

善相陳君持介甫子瞻手字示予戲贈短歌

古來相馬失之瘦仲尼亦作喪家狗脣紅齒白癡小兒
不羞障面欺羣醜鶴沖居士術如神東走梁宋西峨岷
諸公蹭蹬未遇日座中知是非常人只今白髮無餘產
短褐逡巡列侯館世人胸中無黑白不如居士明雙眼
嗟予塵貌天所付不須強覓封侯處書生只倚一片心

他日相逢記裴度

記一作說

送葛亞卿欲行不一過僕

吾廬偏仄門三尺慚愧春風巧相覓叩關惟許葛王孫
有時籍草傾餘漑汝不如南池主人車載客紅旗皂蓋
行遠陌又不如東郭公子柳藏門青娥綠髮坐開樽足
身牢落終何為人不汝嫌汝自嗤伸眉一笑能幾時忽
聞春盡王孫歸春風欲盡猶有情飄英墮絮俱傷神王
孫未歸迹已掃秣馬膏車何太早明日一杯愁送春後

日一杯愁送君君應萬里隨春去若到桃源記歸路
陽羨葛亞卿為海陵尉作葺春軒余為賦之

昔聞先生隱吳儂當窓十里橫煙峰今見先生為楚吏
繞牆四面縈烟水從來楚俗帶吳風曲折徑路深房櫳
舍前繫船柳千丈舍後參天竹萬叢千籤挿架似蓬館
白拂挂壁如僧宮掃地焚香欣客至羹魚飯稻愁樽空
不溷不清惟寂寞大笑先生致身錯青山猶作布衣心
朱門却有田居樂筆回造化天工怒胸包今古時人愕

甘窮自許元次山蹈海還尋魯仲連
吾曹一歡豈易得
世間百歲俱可憐何用北窓翻巧策
且向東亭弄春色
我當酌酒壽主人灘前飛下雙鷗瀟

謝錢珣仲惠高麗墨

王卿贈我三韓紙白若截肪光照几
錢侯繼贈朝鮮墨
黑如點漆光浮水舊傳績溪多老松
奚超既死松亦空
易水良工近名世珍才始不歸潘翁
蕭然南堂一居士
赤管隋廩無月賜借問玄圭何自來
去年海中持節使

明窓晏坐不忽忽引紙磨墨寒生風自笑平生縮蛇蚓
更慚爾雅注魚蟲殷勤二物從來遠裨海環瀛眼中見
若欲揮寫藏名山不如却作談天衍

送松陵老農

呼舟越洪濤笑識江南山此行為子來政擬一笑歡相
逢不忍別丘壑同躋攀如何舍我去使我心悵悵子實
名家後翰墨素所便老農雖自謂念子安知田世故亦
已足擾擾徒自憐天寒歲且盡趣駕扁舟還

淮上書事

平楚盡積水長淮多奇峰蕭條月曜夜浩蕩風鳴冬客
行未可歸敝裘那得重寒氣搜病骨清潭貌衰容遠遊
有滯念將老無懽悰故國渺萬里此去嗟誰從

至國門聞蘇文饒將出都戲贈長句兼簡其兄世
美

去年夷門十月雪九衢日是行人絕騎驢兀兀無所之
破袖迎風手龜裂渡橋並慙得君家入門脫帽猶凜冽

急燃濕束煖我寒徐出清酤寧我渴君家自無僭石儲
蠚黃熊白能俱設平生見酒脣不濡是夕連觴耳方熱
羣奴夜僵喚不聞我亦鼾鼻眠東閣明朝起過城南翁
尚記新聲一笑發東歸每嘆懷抱真西來又喜顏色接
方將慷慨豁心胸未用崢嶸驚歲月城南詩翁況遠來
門前雪泥又活活豈知萬事不可期却對吳橋背城闕
人生動若參與商咫尺無論限秦粵君聞吾語雖少留
但恐一歡成電掣念昔相見無他娛誦詩徵事相誇掇

氣凌俗子旁若無偶坐時聞竊嚅囁于今落落誰汝憐
老屋陳編自怡悅寄言詩翁倘留滯歲晚勤迂故人轍
題中寂堂

虎卧文公廬鳥窠道林室本自無俗喧何由辨真寂逃
溺必登山避燔必趨澤君看好靜人萬慮固未息是心
倘已剗對鏡起亦得上人早聞道晚順世間迹振衣下
靈岩飛錫來上國高堂亦何有萬卷繞四壁客來倚風
廊晤語終日夕莫言門如市中有忘機客吾曹詩酒汗

此道誰目擊唯應寂時趣獨有青士識

送子飛弟歸荆南

往在東堂時唯汝年尚少木槍鬪羣兒竹弓射飛鳥今
來跨鞍馬昂然丈夫表入門恍莫識與語意方了脫汝
來時裝夜闌酌清醪當歌喜未定感舊色已愀念我三
年官自裏衣中麁束去盡勾吳北行薄全趙汝亦上岷
峨大江窮浩渺一年兩附書皮筒到家少那知此相遇
乾鵲果前兆我性本齊緩汝資誠楚慄相逢各相規一

月語連曉憶汝初結髮讀書先尉繚謂須壯執爨單于
壘時挑豈期尚羈旅但存雙目瞭我恨緣詩窮賃屋隘
而湫尚盈三尺牀使汝眠奧窔二升糴祿粟醜婢羹茶
蓼時時得鶉兔傍竈親燂燎纔為十日歡鄰里厭煩擾
朝來著戎服數匝鄙條繞辭我出門去歸袖風矯矯還
家對寒食渚宮聞雉鷺想見阿頌君把卷倚叢篠弟妹
乘羊車堂前走相覲何當摠見之緩我歸思杳汝歸與
俱來繁臺及秋杪

贈趙伯魚

昔君叩門如啄木深衣青純帽方屋謂是諸生延入門
坐定徐言出公族爾曹氣味那有此要是胸中期不俗
荊州早識高與黃誦二子句聲琅琅後生好學果可畏
僕常倦談殊未詳學詩當如初學禪未悟且徧參諸方
一朝悟罷正法眼信手拈出皆成章

答蔡伯世食筍

蓴絲化鹽豉槐葉資新麪豈知苦竹萌風味常獨擅昔

我居錦城屢喫田家飯扶杖自入箒煨此犢角鹽後參
鶴林禪餽我桑門饌烝烝沸鼎中亂下白玉片惟無他
物乘始覺真味現三年客東都錦籜寧復見千金洛陽
來惟充大官膳前時過君食欣逢故人面那知列仙臞
已雜蒯通雋吾寧飽甘肥憤吒那忍嚙請歸謂主孟厨
人後當諫苦苴雜嘉蔬沉香和甲剪柯亭既誤椽畫障
或遭練古來可嘆事千載寄明辨作詩弔籜龍助子當
食歎

食煮菜簡呂居仁

曉謁呂公子解帶浮屠宮留我具朝食喚奴求晚菘洗
著點鹽豉鳴刀芼薑葱餓頃香馥坐雨聲傳鼎中方觀
翠浪涌忽變黃雲濃爭貪歛鉢煖不覺定盥空憶登金
山頂僧飯與此同還家不能學空費烹調功硬恐動牙
頰冷愁傷肺胸君獨得其妙堪持餉衰翁異時聞豪氣
愛客行庖豐殷勤故煮菜知我林下風人生各有道昔
蓄用禦冬今我無所營枵腹何由充豈惟臺無餽菜把

尚不蒙念當勤致此亦足慰途窮

送倪巨濟將士

汴流六月翻黃沙小舟兀浪如乘槎赤日下照烘朝霞
腹鳴肩舉氣喘呀夜眠僕夫股相加拖樓晨飯羹黃茄
時時矯首望土岸木末殷轉江洲車渴逢石泉不得汲
椎鼓催發無停撾問君何為趣還家答云五載居京華
夜窓讀書眼生花每食不飽潛咨嗟母髮半白弟髻丫
有妹久闕躬絲麻寄書細字如昏鴉問胡春戀歸期賒

來時書笈手自拿今歸上堂兩脚靴壽觴要及開霜瓜
子志如此良可嘉勸子博學如橫置麋麟兔鹿盡所遮
或典而法竒而葩要歸于正謹去邪行如種植慎萌芽
念當務實勿求誇我行買犢耕三巴佇子佳譽來天涯
出宰分寧別舊同舍五首

公車八千言自獻十二旒落筆中書罷石渠並英游方
欣洛陽遇已慨周南留明堂多梗枿詎須汝薪樵三年
望龍斷艱難身百憂髣髴五分白更落天南陬

念我行老矣才拙世所捐青綾未頻直黃紬且安眠飽
聞縣西寺修椽壓山顛中容五百衆上堂鼓闐闐王程
倘餘暇茲焉著幽禪自擷雙井茶與僧酌雲泉

昔慚雲閣姿斥守蒲城市五占天鷄星未收逐臣淚歸
聞長樂鐘疲馬思一試挈挈今又東敝邑臨無地人生
縛微官大似侏儒戲升沉各幾時怨欣兩當置

益昌剗移文道州拙催科我愚象二子將奈分寧何吾
君放勛姿于今萬邦和縣令但拱手排衙鼓鳴鼉故人

怒挽船勸勿凌江波君其謝故人我亦聊絃歌

陽山昔御史夷陵前校書坐法竄未久遇赦罪已除故
時同舍郎半直承明廬獨奔江西縣道里三千餘皇

闕

倘復哀臣愚念當脫江瘴與子聯朝裾

入鳴水洞循源至山上

崇山蓄靈泉萬古去不息潄為百斛深散入千渠溢其
東匯民田又北尋山腋斷崖如破瓜飛瀑中蕩激大聲
或雷霆細者亦竽瑟未流垂半山十里見沸白得非拖

天紳常恐浮地脈
呂梁丈人老尚與汨偕出
我欲踴驚湍下窮巖
齟石惜哉意徒然
屬此歲凜冽安得汝南周
斷取白蛟脊歸之龍泉峰
山門夜喧席

分寧大竹取為酒罇
短脰寬大腹可容二升而漆
其外戲為短歌

此君少日青而臞
爾來黑肥如瓠壺
縮肩短帽壓兩耳
無乃戲學騶侏儒
人言腹大中何有不獨容
君更容酒未須常要託
後車滑稽且作先生友
少陵斃罇安在哉

次山石白空飛埃茆簷對客夜驚笑麴生叩門何自來
老向人間不稱意但覺淵明酒多味乞取田家老瓦盆
伴我年年竹根醉

湖南有大竹世號貓頭取以作枕仍為賦詩

湖南人家養狸奴夜出相乳肥其膚買魚穿柳不蒙聘
深蹲地底老欲枯誰將作枕置榻上擁腫似慣眠甍甍
慵便玉枕分已無孫生洗耳非良圖茅齋紙帳施團蒲
與我同歸夜相娛更長月黑試拊卧鼠目尚爾驚睂盱

坐令先生春睡美夢魂直繞赤沙湖更煩黃嬾好看取
走入旁舍無人呼

題湖南清絕圖

故人來從天柱峰手提石廩與祝融兩山坡陀幾百里
安得置之行李中下有瀟湘水清瀉平沙側岸搖丹楓
魚舟已入浦溆宿客帆日暮猶爭風我方騎馬大梁下
怪此物象不與常時同故人謂我乃絹素粉精墨妙煩
良工都將湖南萬古愁與我頃刻開心胸詩成畫往默

惆悵老眼復厭京塵紅

送趙承之秘監出守南陽

繁臺十月寒飈颭置酒共祖南陽侯九士一客相獻酬
皆言南陽山水幽菊泉釀酒不論石上酥醍醐出肥牛
使君樓前橘柚古丞相堂下蒲蓮稠夜燃蠟炬賓醉舞
春風歌眠百花洲各持一觴勸公飲此行樂矣公何求
我獨倚杖商聲謳此公人間第一流方今羣賢從法駕
金絨塞路嘶驂騶獨令此公守一州臨分慷慨淚莫收

南陽南陽樂復樂歸來歸來無久留

次韻館中諸公遊慈雲寺

嘉蔬隨客庖香飯出僧甌聊為一飽謀未暇談禪病二
公當代豪詞林氣方盛五言謹詩律百罰嚴酒令樂與
同舍郎共此給園淨想像斜川遊何如舞雩詠甘瓜自
雍丘肥芡來新鄭肴果各有攜笑我室懸磬陋質謝不
往實愧瓊瑤映人生一車足那須富千乘有興驅短轅
寧辭沮如徑及時速行樂莫待苦脚脛炎暑忽已闌當

念時難更

飲酒次人韻

淺瀨見魚遊澄潭知鶴沒疑乘青霞珮徑墮白銀闕平生探學海中年悟禪悅應須臨渺瀰庶以稱超越回塘大圓鏡新蒲細於髮綠扇互低昂玉顏爭秀發良辰宴觴豆炎曦脫巾襪荷聲過雨急竹影敷涼月緩行躡芳草移坐蔭深樾何當酒拍浮恣聽舟搖兀而我方抱鉛上馬自腰笏叩門不聞呼造席無乃咄詎敢陵崆峒幸

許窺剗剗願公開迷雲令我入理窟雄篇出月脇妙思
露天骨蹇走那由追智井媿先竭

題采菊圖

往在京口為曾公卷題采菊圖九日東籬采落英白
衣遙見眼能明向令自有杯中物一段風流可得成
蔡天啟屢哦此詩以為善然余嘗謂古人寄懷於物
而無所好然後為達況淵明之真其於黃花直寓意
耳至言飲酒適意亦非淵明極致向使無酒但悠然

見南山其樂多矣遇酒輒醉醉醒之後豈知有江州
太守哉當以此論淵明復作二首

黃菊有何好且寄平生懷遇酒興不淺無酒意亦佳此
理誰復明自昔寡所諧空餘采菊圖寂寞懸高齋

今日菊始華叢鴈鳴相和若無一觴酒如此重九何悠
然數酌盡會心豈在多醒來不復記散髮東山阿

去冬除守歷陽未上召還西掖今夏自應天尹移
知齊安道由歷陽珪老相訪奉簡一首

嘗聞歷陽郡寺有褒禪山及我分竹符欲往窮躋攀驅
車發半道尺一喚我還歎息岩下水何時照衰顏復持
齊安節稅駕臨通闕屬有行役累無由叩僧闕珪公岷
峨秀逸韻超人豪攜詩遠過我慙慙請加刪少年意氣
盛笑我毛髮斑夜語不知寢起看江月灣浮生浪擾擾
萬法本自閒為吏何足論誓將老榛管買田未及議我
實貧非慳奉乞一菴地往來泉石間

武寧道中

小灘嘈嘈大灘惡朝行羊腸暮鹿角盡日拖舟不得前
忽然筴斷千尋落上梁左側石子多兩船與石鳴相摩
卧聽溪師倚篙哭將如四十二灘何

羊腸鹿角上梁皆灘名

次韻曾通判登擬峴臺

朝攜筇杖來暝倚胡床坐循牆讀遺碑歲久苔蘚浣烈
風無時休於茲驗真箇曾郎吐佳句勢突黃初過交遊
得詩流吾儕可相賀念昔逢大梁一別久鑽火再見疑
前身居然客愁破世久無若人子豈伯休那

曾時
丁憂千山

厭露宿一壑期雲卧子少方鵬騫吾哀作鳶墮篇成不
敢出畏子詩眼大唯當事深禪諸方參作麼文章真綺
語季緒徒瑣瑣安得京口歸秋江細扶柁

題蕃騎圖

塞上

一作沙揚

漠漠黃雲秋黃鬚鮮卑騎紫騮一

一作白

馬攬

前弄風走健兒掣轡空驤首迴鞭慎莫向南馳漢家將
軍方打圍奪弓射汝猶可脫奪汝善馬何由歸

題韓晃畫瀛洲學士圖

咸陽中天開帝居羣公下直承明廬長鞦短轡褒衣裾
蒼頭廬兒爭走趨韓侯畫此時無虞瀛洲仙人樂有餘
我生不及貞觀初忽思十年身校書吟詩天街騎蹇驢
爾來戎馬方馳驅眼厭繡掘蒙諸子把卷未展先歔歔
順老寄菜花乾戲作長句

道人禪餘自鉏菜小摘黃花日中曬峨嵋楩脯久不來
麴糝薑絲典刑在封題寄我紙作囊中有巴蜀齋廚香

起炊曉甑八月白配此春盤一掬黃

楩軟木耳八月白稻名也

李氏娛書齋

欲樂誑凡夫，須臾皆變壞。唯書有真樂，意味久猶在。李君名家流，事業窺前輩。澹然無他娛，開卷與心會。憶吾童稚時，書亦甚所愛。傳抄春復秋，諷誦晝連晦。飲食忘辛鹹，汙垢失盥頽。爾來歡喜處，乃在文字外。卷藏二萬籤，棐几靜相對。此樂君未知，狂言勿吾怪。

送王秘閣二首

烏衣諸王吾早聞，晚途獨識和州孫。風流踏拖欲垂盡，

文采陸離今尚存奉祠乃是哀翁事如君胡為亦為此
僕夫在門君疾驅往獻天子平邊書

右軍池頭鷓鴣呼康樂臺下移檉疎碧山學士此築室
白髮散人來卜居身隨沙鷗卧烟雨十年無書上公府
枉作西班老從臣看君才華不能舉

送里人陳會往見江西漕使

勸君少留持一觴與君鄉里皆陵陽兒童共戲苦鹽岸
老大相逢烏石岡拾遺平生丈人行拊我謂我能文章

豈知今無一絲長但餘顛華面顏蒼君行往見玉節郎
感時憂國歌慨慷餉師十萬西平羌笑我挾複山中藏
夜與疎山清公對語因設果供戲成長句

落葉屑窸鳴風廊四無人聲夜未央道人過我談真常
客舍有底相迎將竹鑪篝火曲木床烏柏為燭楓脂香
青梨累累飣坐光黃甘十子近著霜醃梅蜜杏經年藏
紅糝綴枝加柘漿萼藕諸芋蘘荷薑堆盤滿案次第嘗
憶初見翁修水旁轉頭八十鬚眉蒼爾時尊宿略喪亡

屹如樅檜老不僵而我昔漫參朝行十年投閒坐老狂
人生一夢炊黃梁諸法本閒人自忙況今世故甚擾攘
與翁幸憩菩提坊夜闌一酌餘甘湯它年此樂不可忘
上秦州使君陳瑩中

當年賢路雜薰蕕歎息諸公善自謀今日在前皆鼎鑊
後來知我獨春秋海邊已擊師襄磬湖上新逢范蠡舟
惟有書生更無事不妨挾冊更西遊

聞富鄭公少時隨侍至此讀書景德寺後人為作

祠堂因跋余舊詩後以自嘲

藤床瓦枕快清風
破悶文書亦漫供
鄉信未傳霜後鴈
羈懷生怯晚來鐘
淹留已辦三年計
流落應無萬戶封
猶有壁間詩句在
他時誰肯寫塵容

海氣昏昏又嘯風
一杯扶病要時供
三年閉戶兒童怪
千古閒情我輩鍾
若得黃甘應手種
更求青李莫函封
疎頑自笑將安適
寄謝江山好見容

次韻留別南公

天遣吾曹與世疎那將窮技學黔驢只今年少身多病
是處愁深淚濺裾此去不須論塞馬向來猶有莖江魚
虛名只用驚兒輩要作生涯莫著書

九絕為亞卿作

離歌三疊最關情不省從來此地聞早是春殘心事惡
落花陰裏更辭君

君去東山踏亂雲後車何不載紅裙羅衣浥盡傷春淚
只有無言持送君

更欲鐫前抵死留為君徐唱木蘭舟臨行翻恨君恩雜
十二金釵淚總流

世上無情似有情俱將苦淚點離樽人心真處君須會
認取儂家暗斷魂

君住江濱起畫樓妾居海角送潮頭潮中有妾相思淚
流到樓前更不流

憶汎郎舟共採蓮今來揮淚送郎船回書倘寄新翻曲
湖上何人為扣舷

一夢平陽樂已窮三年猶復怨匆匆
倏倏雲驟雨成何事
未必三年抵夢中

妾願為雲逐畫檣君言十日看歸航
恐君回首高城隔
直倚江樓過夕陽

初合雙鬢說後期相盟不在已
相知來時休落春風後
却漫嘲儂子滿枝

送俞仲寬赴宿倅

年少場中晚節寒去年揮手下天關
何人肯躡風波路

自古難言骨肉間，十里即應歸漢闕。一帆從此別淮山，
艤舟如得僧伽印，未用將身付等閒。

五月八日游北禪師川登塔盡七級，僕能三級而
已。晚過公晦偶作二首。

徐郎胸次已冰清，北寺清游更絕塵。不欲茹葷緣道友，
肯來出郭是詩人。憐君遠客情能爾，看我題名墨尚新。
誰有好方扶脚力，故鄉歸去蹋峨岷。

鐵鑱銅鑲一一開，肩輿不問主人來。已登白塔吾休矣。

更上紅亭子壯哉世外清歡須邂逅城頭落日共徘徊
雲樓五月滄洲去羞殺初無八斗才

曾大父有詩云三春拂榻花黏袖午夜淘丹月在
池舍弟子飛歸蜀與語及此因取為韻

去蜀初遊楚吾方十二三無成今長大送汝不勝慙
還家倘無事莫負故園春衣錦兒嬉爾從來笑買臣
艤舟不能前已復日西沒贈子以幽蘭秋風正披拂
野宿月團欒風餐氣蕭颯從來對床地只今懸一榻

入蜀尋幽跡應先到浣花誠知錦城樂亦記早還家
魚游因餌得鳥困坐竊黏顧我今如此空懷石井鹽
逢年要力耕善舞須長袖北山休移文南山歸種豆
一棹送君歸酒醒秋江午正是蓴鱸時思君在何許
明月落帆時荒山孤夜夜回首白雲飛吾親在其下
客行宜努力時亦近醇醪一盞熏人醉雲安米正淘
爾去逢諸父髯霜貌渥丹貧窮宜此報富貴却難安
揚州十里春蛾眉半輪月茲游真不凡詩成想清絕

吾祖屯田公遺書悉安在為我謝諸兄蠹魚時一曬
故山不可到歸夢到天池想見山中叟磨崖待我詩

次韻參寥

此身不擬墮塵緣長恐驚鴻落響弦
蹋盡世間千澗壑歸來胸次一山川
深宮木末猶秋色故國天涯只暮烟
憑仗道人分石甃要看庭下玉龍旋

且向家山一笑懽從來烈士直如弦
君今振錫歸千頃我亦收身入兩川
短世驚人如掣電浮雲過眼亦飛烟

何當與子超塵域下視紛紛蟻磨旋

泰興道中

縣郭連青竹人家蔽綠蘿地偏春事少山迴夕陽多
暗水披崖出輕船掠岸過傳呼細扶柁吾老怯風波

智勇師歸永嘉自言所居在萬竹間乞詩送行

上人歸去家何許萬竹深園一把茅
踴盡叢林叅白足却來江檻俯青郊
夜階蔌蔌風翻籜春路冥冥雨放梢
肯拚清陰分百十暮年思與子論交

送黃若虛下第歸湖南

時人會傍高門走，獨有來游翰墨場。
已有哲兄如叔度，定知吾子勝文強。
長淮白浪搖春枕，故國青山接夜航。
乞得功名歸遺母，未應深羨綠衣郎。

館中直宿書事

十載名山慣杖藜，清都直宿夢魂疑。
卧聞長樂鐘聲近，尚憶寒山半夜時。

北風吹馬襲貂裘，薄雪連雲凍未收。
銀闕晝開禽鳥白，

信知三館是瀛洲

行至華陰呈舊同舍

落日同騎款段游
倦依松石弄清流
蓬萊漢殿春分手
一笑相逢太華秋

次韻思聰

欲問琴聰水鏡篇
揭來端為著幽禪
五更下馬呼殘夢
數面成親是宿緣
伏腦憐君有犀骨
騰身笑我不鳶肩
白頭奔走襄陽道
空誦新詩憶浩然

和李上舍冬日書事

北風吹日晝多陰日暮擁階黃葉深倦鵲繞枝翻凍影
飛鴻摩月墮孤音推愁不去如相覓與老無期稍見侵
顧藉微官少年事病來那復一心分

偶書二絕呈館中舊同舍

去年看曝石渠書內酒均頒白玉腴今日醉登延閣望
幾人回首憶窮途

御本曾看錦帕舒醉驚飛閣上淩虛而今卧病衡門底

自曬郊簷幾卷書

送蘇世美東歸

東游兩見鶴林春晚愧先生作並鄰罇俎每留舍猝客
典刑猶識老成人繫舟一笑都門外賣劍歸耕潁水濱
意氣年來類兒女別離不覺淚橫巾

京口尋山每見攜鶴林問法更追隨本無物累那成癖
肯借人書未必癡食粥往年容乞米一罇今日細論詩
刊溝好去春風煖莫忘椎冰共載時

梅花三首

江南歲晚雪漫漫
礪谷梅花巧耐寒
幸有幽香當供給
不辭三載滯西安

雲根細路遶溪斜
日出烟銷水見沙
只度關山魂已斷
可須疎雨濕梅花

籃輿曉入關山路
玉節珠旂次第開
白髮微官何用許
似憐身出道山來

夜泊寧陵

汴水日馳三百里，扁舟東下便開帆。
旦辭杞國風微北，夜泊寧陵月政南。
老樹挾霜鳴窸窣，寒花垂露落毵毵。
茫然不悟身何處，水色天光共蔚藍。

庚子年還朝飲酒絕句

三年逐客卧江皋，自與田翁酌小槽。
飲慣茆柴諳苦硬，不知如蜜有香醪。

往時看曝石渠書，內酒均頒白玉腴。
落魄十年無復醉，因公今日識官壺。

送海常化士

好去凌空錫杖飛，鳳林關外道場稀。
莫言衲子籃無底，盛取江南骨董歸。

次韻何文績種竹

杜陵窮老覓檀栽，不似何郎種笛材。
三徑莫憂荒草合，一樽如與故人開。
未堪急雨枝枝打，便有幽禽日日來。
坐誦東坡食無肉詩，腸日午轉飢雷。

次韻王給事觀殿試唱名

集英春殿唱諸生日轉觚稜晚色清近侍皆分金帶赤
內人爭看雪衣明

內人多自昇平樓上下觀

罷朝詔賜羣公坐合殿

歡傳萬歲聲我老倦隨宮漏水江南江北聽鼃更

次韻翁監再來館中

歸老江湖久自盟睡餘且復對空枰重來內閣人誰健
慣踏天街馬不驚已喜劉歆分七略尚傳韓愈誨諸生
太平潤色須公等應許吾兼吏隱名

次韻館中上元游葆真宮觀燈

百千燈射水晶簾尚覺游人意未厭多病只思田舍樂
夜歸烟火望茅簷

玉作芙蓉院院明博山香度小崢嶸真言水北人稀到
也有繁姍勃窣行

鴨綠未全生曲沼鵝黃先已上柔柯故應春物撩詩思
白髮明朝一倍多

開卷愛公如李益解言明月逐人來多情如共春流轉
刻燭題詩又一回

澹澹新粧帶淺啼催車只待日平西驂騑也自知人意
散入千花了不嘶

申應時卜居京口名之曰雲棲又曰小築乞詩送
行

客舍秋來憶舊居一帆歸去落東吳他年寄我新詩句
即是雲棲小築圖

次韻何文縝舍人後省致齋

夜直沉沉浴殿南春風想對百花潭藤床轉枕尋餘夢

粉壁題詩倚半酣
追記舊游時
一笑歡參真理
莫多談
白頭初試絲綸手
歸去扶犁意亦甘

次韻侯思孺將至黃州見簡

未用船頭報水程
為君持酒打愁城
青山久負當年約
白髮多從客路生
點檢轉工新句法
揩磨難減舊風情
小留莫道無供給
一味東籬有落英

故資政忠惠韓公挽詞

藉甚中山守風流
世有人獵園邊月
曉筵踏塞花春金

絮盟猶在灰釘事已新使公長卧護何地起烟塵

以正賜庫蒲萄醕送何斯舉復次其韻

歎息蘇公無恙日坡頭自築小山房五年不識宮壺味
只以春江當酒腸

老臣政實不堪論尚得君王賜酒樽異日黃州成故事
蒲萄醕熟記初元

登赤壁磯

緩尋翠竹白沙游更挽藤梢上上頭豈有危巢與棲鷗

亦為陳迹但飛鷗徑營二頃將歸老眷戀羣山為少留
百日使君何足道空餘詩句在江樓

次韻耿龍圖秣陵書事

十月舟藏

一作橫

蘆荻林客衣頓覺夜寒侵亂離祇有窮

途淚勲業都無過去心敢恨青鞋踏江浦近傳黃屋渡
淮陰太平氣象須公等是日頻聞正始音

次韻金陵趙德夫使君上元三絕

小風吹水漲平湖屋角殘冰亦已無投老只圖春睡足

可須山鳥強招呼

卧聽秦淮鳴咽聲起看江月暮潮平舊時憶在延真觀
玉作芙蓉院院明

憶昨宣和從武皇春風省試御袍香自從翠蓋尋沙漠
無復徵歌出洞房

次韻南溪觀魚

城西鼓櫂又城東不待溪分上下風碧樹垂楊間黃綠
水盤行鱸簇青紅橫塘日暮林巒合斷岸秋來浦溆通

安得此身無世累便隨漁艇入空濛

再次韻兼簡李道夫

麥秋宜晚起況復雨頻頻桃竹猶能杖柴車未可中間分酒賢
聖靜記藥君臣會有騎鯨李來陪賀季真

李侯梨釘坐風味勝仁頻投老須鳴玉相看尚禿巾便應尋
木客何必問波臣不復來城市從人笑我真

猶記一麾出敢論三顧頻餘生過飛鳥幻事捏空中學道無

疑怖憂時有主臣買舟茗雪去我亦號玄真

漢書主臣
皇恐之貌

次韻錢遜叔侍郎見簡

白頭逢世難無地可推愁
曉日瞻天闕春風憶御溝
他年余老蜀萬戶子封留
尚記臨川郡溪山爛熳遊

往歲自京口與曾公永宏父同行至下蜀因次前韻簡之

下蜀追隨日歡言一散愁
籃輿轉陂路小槳渡潮溝
萬里家何在三年淹此留
猶欣遲暮眼見子並英遊

撫州邂逅彥正提刑道舊感歎輒書長句奉呈

金少卿
卷三十三
憶在昭文並直廬與君三歲侍皇居花開輦路春迎駕
日轉蓬山曉曝書學士南來尚岩穴神州北望已丘墟
愁逢漢節滄江上握手秋風淚滿裾

送曾宏父

見子京江尚少年大梁重見已翩翩頃來更覺文章進
他日寧容老病先梅谷舊題幽谷引橋波新和漢陂篇
常慚散吏空稱賞不敢吹噓上九天

乃翁名見豫章詩學術傳家有大兒四海共推文賦早

三年應詔省郎遲生逢側席求賢日即是摩霄聳壑時
若到朝廷問衰朽為言常宿畏人知

次韻錢遜叔侍郎見簡

掃地焚香元自喜傍門騎馬向來慵田園此去須安枕
海岱今年不舉烽已分瘦藤扶病骨生憎明鏡寫衰容
兩公故是經綸手足問腰金早晚重

信州連使君惠酒戲書絕句謝之

憶傾南庫官供酒共賞西京勅賜花白髮逢春醒復醉

豈知流落在天涯

故事每歲洛陽貢花賜館職百朵并賜南庫法酒

次韻錢遜叔謝曾使君送酒

誰憐定武故將軍

侍郎常除定帥

醉舞狂歌老更真好事時分

小槽酒殘樽也到白頭人

次韻曾寺丞觀早朝上徐諫議

憶昨飄然下葉闌十年江海望嚴宸遙知駐驛艱危地
尚有憂時老大臣已起陽城無諫諍又傳陸贄掌絲綸
為公細數能文士幾箇麒麟閣上人

次韻徐翰林

遠聞仙伯上神山始覺升平氣象還一夢休論玉堂事
兩行曾綴紫宸班想燒椽燭書天詔看剪花驥出帝閑
尚憶平生故人否夜驅黃犢在田間

某頃知黃州墨卿為州司錄今八年矣邂逅臨川
送別二首

自罷黃州守殊方任轉流寧論九年謫已判一生休此
士真材傑諸公定挽留倘歸存老病車騎擁西疇

盜賊猶如此蒼生困未蘇
今年起安石不用哭包胥
去朝行在人應問老夫髭
鬚哀白盡瘦地日攜鉏

送雲門妙喜遊雪峰

老子幽棲地勞君久見存
夜氈從栗爆午盃看茶翻
舊事時追憶深禪得細論
還應雪峰老領衆待雲門

送東林珪老遊閩二絕

直自三湘到七閩
無人不道竹菴名
詩如雪竇加奇峭
禪似雲居更妙明

竹菴端為故人留尚許衰翁預勝流
寄語叢林好清客
未宜輕輓雪峰毬

即席送呂居仁

一樽相屬兩華顛落日臨分更泫然
蹀躞鳴珂君得路
伶俜散策我歸田
近聞南國生涯盡
厭見西江殺氣纏
欲買扁舟吳越去看山
看水樂餘年

余往歲與遜叔侍郎同寓廣陵靖康元年遜叔守
符離余被召過焉未幾余守南郡遜叔移真定

過留數日紹興二年復同寓臨川感念疇昔奉
送一首

廣陵三歲共祠宮二月帆開二水風北渚蕩舟公醉我
南湖張樂我留公豈知去國千山外又復連牆一笑同
喪亂難堪重離別可無書札問哀翁

余為著作郎如瑩為司令官舍皆在左掖門外高
頭坊紹興四年如瑩持節江西道撫相訪輒成
長句

邂逅都城接下風官居總在日華東門瞻曲角趨朝近
路轉高頭出局同今日繡衣新使者晚塗霜鬢舊鄰翁
一杯無復當時樂赤縣黃圖淚眼中

次韻曾吉父見簡

往歲滄波轉地流是身如沫信沉浮初聞盜賊奔他境
漸見衣冠集此州病欲深耕歸谷口禪須末句問岩頭
膺門也自知人喜有客清真似子不

六月二十一日子文待制見訪熱甚追記館中納

涼故事漫成一首

漢閣西頭千步廊與君長夏對胡床陰陰檜色連宮草
寂寂棋聲度苑牆細乳分茶紋簟冷明珠擘芡小荷香
身今老病投炎瘴最憶冰盤貯蔗漿

送范叔器次路公弼韻

晚塗淹泊向誰論白髮名卿肯見存雒邑風流餘此老
故家文獻有諸孫寺連狹徑曾傾蓋船擁清溪尚一樽
小駐鄱陽未宜遠欲憑書尺問寒溫

謝人送鳳團及建茶

白髮前朝舊史官
風爐煮茗暮江寒
蒼龍不復從天下
拭淚看君小鳳團

山瓶慣識露芽香
細弱勻排訝許方
猶喜晚塗官樣在
密羅深碾看飛霜

頃年侍立集英殿
見周表卿唱名第二
客居臨川表卿為宜黃丞歲滿訪別作詩送之

往時束帶侍明光
曾看揮毫點御床
只道驂騑已騰踏

不知鵬鷃尚摧藏官居四合峰巒雨驛路千林橘柚霜
莫為艱難歸故里漢庭今重甲科郎

似矩尚書師桂道由臨川賦詩三首貽彥章內翰
謹次元韻送行

喪亂乖離數哀慵問訊疎新霜上鬚髯老淚濕襟裾忽
報迎車騎遙知奉璽書豈惟謀郤縠文亦似相如
有人談五嶺曾翠象衡廬地長十尋竹波跳三尺魚看
公羅鉢笑我老耕鉏敢望頻書札相望萬里餘

卻戟蒼山上平分二水流四時無瘴氣五管有賢侯靜
契羅公遠禪參帛道猷人生一麾樂不必向中州

曹山老送筍蕨與諸禪客同食戲成

笠寺瓶罌至吾廬水竹幽閒緘喜風韻喚客少淹留蕨
帶寒山醬筍蕨散子油誰能知許味一飽併無憂

送宜黃宰任滿赴調

故老凋零盡君猶識了翁深知名節似不但里閭同

若與

了翁同縣伯政府方交辟高賢豈久窮他年汝溪上伴


言慕其為人

我釣秋風

送張右丞司赴召

老夫宴坐臨川寺五見君為萬里行
病馬不辭遭掣頓雲鵬那復計期程
遙知此去常乖隔莫惜書來訪死生
早與朝廷定巴蜀故山遲暮欲歸耕

宋詩鈔卷三十三



總校官庶吉士臣張能照

校對官待詔臣胡士震

謄錄監生臣金拔